

ZEN

“ӨЗЕНМҰНАЙГАЗ” АҚ КОРПОРАТИВТІ ЖУРНАЛЫ

№4 (86) СӘУІР 2023 ЖЫЛ



**ӨНДІРІС - ҚАТАҢ ТӘРТІП ПЕН ҮЛКЕН
ЖАУАПКЕРШІЛІКТІ ТАЛАП ЕТЕДІ!**



“ӨЗЕНМҰНАЙГАЗ” АҚ КОРПОРАТИВТІ ЖУРНАЛЫ

МЕНШІК ИЕСІ:

«Өзенмұнайгаз» АҚ
№4 (86) сәуір 2023 жыл

Журнал ҚР Ақпарат және
коммуникация министрлігінде
есепке алынып, №16077-Г куәлігі
берілген.

**ЖҰРТШЫЛЫҚ ЖӘНЕ МЕМЛЕКЕТТІК
ОРГАНДАРМЕН БАЙЛАНЫС БӨЛІМІ**

ЖОБА ЖЕТЕКШІСІ:

Әділ СҮЙЕБАЙ

БАС РЕДАКТОР:

Бибігүл БӨБЕКБАЙ

ШОЛУШЫ:

Арғын БИСЕНОВ

ТІЛШІЛЕР:

Жазира АҚБЕРГЕН
Айман МАДРЕЙМОВА
Талғат САТЫБАЛДЫ

РЕДАКЦИЯ МЕКЕН ЖАЙЫ:

ҚР, Маңғыстау облысы, Жаңаөзен
қаласы, Сәтбаев көшесі, 3-ғимарат,
426-кабинет, 8 /72934/ 63445

Шығу жиілігі айына 1 рет.
Журнал материалдарын
көшіріп басуға редакция
рұқсаты қажет

Журнал «АТИС» ЖШС
баспаханасында басылды

БІЗГЕ ЖАЗЫЛ:

FACEBOOK



TELEGRAM



INSTAGRAM



TIKTOK





**«Өзенмұнайгаз» АҚ
бас директоры
Нұрдәулет ҚИЛЫБАЙ**

Құрметті геолог әріптестер!

Сәуірдің алғашқы жексенбісінде аталып өтілетін Геологтар күні кәсіби мерекесі құтты болсын!

Компания бас директоры ретінде геолог, геофизик, геодезист, жалпы осы мәртебелі мамандық иелеріне, еліміздің мұнай әлеуетіне серпін беріп, жаңа кен орынның ашылуына тікелей мұрындық болған ардагерлеріміз бен бүгінгі күні қызмет етушілерге Өзен кен орнын игеріп, өлкенің ғана емес еліміздің дамуы жолында еткен ерен еңбегі мен төккен

маңдай тері үшін зор алғыс білдіремін.

Білім мен тәжірибеңіз, адалдық пен табандылығыңыз алға қойылған міндеттерді орындап, үлкен табыс пен мол жетістіктерге жетіп, мұнаралы түбек, кенді мекеннің ел ризығына айналуына жол ашты.

Сіздердей майталман мамандарды біз мақтаймыз, Өздеріңізбен мақтанамыз.

Мықты денсаулық, баянды бақыт, ел игілігі үшін атқарып жүрген қызметіңізге сәт тілеймін. Алар асу мен бағындырар белес көп болғай!

КЕН ОРЫН ДАМУЫНА ӨЛШЕУСІЗ ҮЛЕС ҚОСҚАНДАР

Өндірістік блок мәжіліс залында Геологтар күні кәсіби мерекесіне орай салтанатты жиын өтті.

Шараға бас директордың бірінші орынбасары Нұржан Әбдірахманов, геология және игеру жөніндегі орынбасары Шолпан Пангереева қатысып, Өзен, Қарамандыбас кен орындарын игеруге өлшеусіз үлес қосып жүрген сала мамандарына табыс тіледі.

– Қадірлі әріптестер! Кәсіби мереке құтты болсын. Киелі топырақта ерен еңбек етіп, ел игілігі үшін тер төгіп жүрген Сіздерге мереке күні қандай тілек айтсақ та жарасады. Өзен кен орны дамуына өлшеусіз үлес қосып, бірлігі жарасқан,

бақыты мен дәулеті тасыған компания ырысын еселеп жүрген Өздеріңізге шексіз алғысымды білдіремін, – деді Нұржан Базарбайұлы.

Мұнай-газ саласы дамуына қосқан елеулі үлесі үшін бір топ геолог ҚР Энергетика министрлігі, «ҚазМұнайГаз» ҰК АҚ басқарма төрағасы Мағзұм Мырзағалиевтің Құрмет грамотасы, Алғыс хатымен марапатталды.

Өз кезегінде Шолпан Серікбайқызы марапаттың адамға қанат бітіріп, жігер сыйлайтынын айтып, көсіліп жұмыс істеуге мүмкіндік жасап отырған басшылыққа ризашылығын білдірді.





«БАЛАҚАЙДА» 32-БАЛАНЫҢ ТҰСАУЫ КЕСІЛДІ

«Балақай» оңалту орталығында 32-баланың тұсауы кесілді. Әмір Сайын атты екі жастан асқан балапанның тәйтәй басқан қуанышына Химияландыру және экология басқармасы ұжымы қатысты.

Сөз алған аталмыш басқарма директоры міндетін атқарушы Бақытбек Мергенбаев Әмірге «дені сау, көңілі дархан даладай бауырмал, қадірлі, қайырымды көпшіл азамат болып өссін, молшылықта ғұмыр кешсін» деген жүрекжарды тілегін жеткізді.

Ұжым атынан балапанға «Toyota Land Cruiser Prado» ойыншық көлігі тарту етілді.

– Қанша шаңырақтың қуанышына себепші болған мұнайшылар мен орталық дәрігерлеріне шын жүректен алғыс ай-

тамын. Алла берген егіз баланың сыңары Әмірдің әлсіздігін байқап, бір жас үш айында орталыққа әкелдім. Тәжірибелі мамандардың арқасында балам 4 айдан соң аяққа тұрды. Әйтсе де оң жақ дене бөлігінің әлсіздігінен жүріп кете алмады. Емді жалғастырдық. Баламның аяғына тұрғанын көріп қуаныштан жүрегім жарылғалы тұр, – деді Әмірдің анасы Әйгерім Қуанышбаева.

«Дүниеде баланың у-шуына жетер не бар?! Одан асқан сазды әуен ойлап табу мүмкін емес...» – депті батыр атамыз Бауыржан Момышұлы.

Қиындыққа тап болған балаларды мейірімге бөлеп, жарқын болашаққа деген үміт отын жаққан қайырымды жандарға мың алғыс!



СЕНБІЛІК – ТАТУЛЫҚТЫ НЫҒАЙТЫП, ІШКІ КОММУНИКАЦИЯНЫ ДАМЫТАДЫ

№4 2023

Тазалық айына жататын сәуірде компанияға қарасты 16 басқарма ұжымы бір жеңнен қол, бір жағадан бас шығара отырып, сенбілікке шықты.

Нәтижесінде жұмыс орнынан қоқыс шығарылып, тал түбі әктеліп, қисық бұтақтар кесілді. Бірігіп жұмыс істеу – татулықты нығайтып, қарым-қатынасты жақсартта түседі.

Бірлігі жарасқан, дәулеті тасыған компания ұжымы сенбілік ұйымдастыру арқылы ішкі коммуникация дамуына қомақ-

ты үлес қосып, көпке үлгі, көңілге ыстық жарқын істің жаршысы бола білді.

– Еңбекке бір кісідей жұмылып, белсенді түрде жұмыс істеу – адамға ерекше ләззат сыйлайды екен. Әр мұнайшының жұмыс күні тазалықпен басталуы тиіс деген ой түйдік. Шашылып жатқын қоқыс, күтім көрмеген талдар адамның жұмысқа деген құлшынысына кедергі келтіреді. Реттілік, тазалық адамның жұмыс қабілетін арттырады, – дейді сенбілікке қатысқан мұнайшылар бір ауыздан.





ӨМІРІНЕ БЕК РИЗА КЕНЖЕБЕК

Кенжебек Қоблашев 1961 жылдың 1 сәуірінде дүниеге келді. Әкесі Алдоңғар 1964 жылы Өзен стансысына тепловоз машинисі болып іссапарға келеді. Өзен мұнайы атқылаған кезі еді. 1965 жылы әкесі бүкіл отбасын көшіріп әкеледі. 1968 жылы мектеп табалдырығын аттаған Кенжебек 1978 жылы бітіріп, оқу орталығынан білім алып, жұмысқа орналасады.

«Адамның басы – Алланың добы» демекші, 1979-1981 жылдары Венгрияда әскери борышын өтеп қайтады. Әскерден шыңдалып келген жігерлі жас жігіт №1 Скважиналарға қызмет көрсету басқармасына машинист жүргізушісі болып жұмысқа орналасып, күні бүгінге дейін Өзен кен орны дамуына зор үлес қосып, өнімді еңбек етіп келеді. 1982 жылы ӨЭМБ-да

жұмыс істеп жүрген Қаламқас атты сұлумен көңіл жарастырып, отау көтереді.

– Өміріме бек ризамын. Алланың берген ұл-қыздарынан тараған желкілдеп өскен құрақтай немере-жиендер көңілге медеу. Ұлым да мұнай саласында қызмет етіп, ел ырысын еселеп жүрген азамат. Бос уақытымда қасиетті Құран оқып, жаныма рухани азық аламын. Қазақстанымыз жақсарса, өркендесе деген тілек бар, – дейді мақала кейіпкері.

Қазақтың жезтаңдай әншісі Роза Рымбаеваны тыңдағанды ұнататын Кенжебек «Қыз баланы жоқшылық бұзады, Ұл баланы тоқшылық бұзады», – деген мақалды жиі пайдаланады.



ҚҰРЫЛЫСТЫҢ ӨЗ АДАМЫ

Күрделі құрылыс департаменті инженері Исахан Тобақабылов 1960 жылы қарашаның 26 жұлдызында Түркістан ауданы Орағай селосында көп балалы отбасыда дүниеге келді. Марқұм шешесі ұлды да, қызды да төгіп тастап, Исaханның 3 жасында қайтыс болды. Әкесі 14 жасында қайтыс болып, жасөспірім Исахан ағасының қолында тәрбиеленеді. Туған селосындағы Мұхтар Әуезов атындағы мектепті бітірген ол Украинаның Львов қаласында әскери борышын өтеп қайтып, Ташкент қаласында Чкалов атындағы авиациялық зауытында ұшақ аппараттарының құрастырушысы болып жұмыс істеді. Ташкентте жүріп, болашақ жарымен танысады. Педагогика институтының филология факультетінде оқитын ол орыс тілі және орыс әдебиеті сабағынан сабақ беретін мұғалім болады. Исахан да сурет салу мамандығын таңдамақшы болғанда сүйіктісі архитектура саласын таңдауға кеңес береді. О бастан жазу-сызуға икемі бар жігіт 5 емтиханнан да сүрінбей өтіп, Ташкент политехника институтының архитектура факультетіне қабылданады. Арманына қол жеткізген жас жігіт қуанышы қойнына сыймай бөркін аспанға атып, білдей оқу орнының студенті атанып шыға келеді. Ташкентте 2 жыл оқыған ол, 3-курстан бастап Самарқандағы архитектура құрылыс институтына ауысып, сол жерде оқып жүріп, жұмысқа орналасады.

1997 жылы Жаңаөзен қаласына көшіп келеді. Берекелі шаңырақта ұлықты ұл, қылықты қыз өсіп шығады. Үлкен ұлы Англиядағы Ньюкасл қаласында оқып, халықаралық заңгер мамандығын алып шығып, бүгінде «Верный капитал» жекеменшік компаниясында абыройлы еңбек етіп жүрген жайы бар. Қызғалдақтай құлпырған Айнұры КОО-да экономист болып



істейді. Кіші ұл, шаңырақтың иесі Сұлтаны «ҚазҒЖЗИ» жобалаушы-технолог лауазымында. Баян, Жанна атты қыздары Омбыда оқып, экономист мамандығын алып шығып, қазіргі таңда Астана қаласында тұрып, ел дамуына өзіндік үлес қосып жүр. Оларды Жаңа Қазақстан іргесін қалаушылар деп айтсақ артық болмайды. Қолына қылқалам алып, сурет салуды жаны сүйетін немересі Асылжаны 2009 жылы мектепте туындылары қойылған фотокөрмесін ұйымдастырып, көрермендер ықыласына бөленіп келеді. 2013 жылы дүние есігін ашқан Малика атты немересі де сурет салғанды ұнатады. Өзінің картиналарынан үлкен көрме жасады.

Мектепте 7-класқа дейін класском болған Исaханның арасында мұғалімнің



орнына қалғанда ватманға салып Микки маус, «Ну, погоди» қасқыр мен қоянның суреттерін салып әкеліп, оқушыларға көрсететін еді. Тоғетері, сурет салу Тобақабылов әулетінің хоббиі десек, артық айтқандық болмас еді. Исахан демалыс күндері базарға барып, күріш пен сәбіз таңдап, үйге келіп дәмі тіл үйретін палау пісіреді. Тағдырына дән риза бақытты жан жақындарына дәмді тағам әзірлегеннен ләззат алады.

Бос уақытында жанын нұрға, тәнін рахатқа бөлейтін Ескендір Хасанғалиев пен «вальс каролі» Шәмші Қалдаяқовтың әндерін тыңдайды.

– Сүйікті актерім Джеки Чан. Ол бала кезінде көп қиындық көріп, өзінің төзімі мен табандылығы арқасында белестерді бағындырды. Аңыз адамның өмір жолын өзіме үлгі етіп алдым, – дейді кейіпкеріміз.

Сегіз қырлы бір сырлы жігіт ағасы Омар Хайям мен Конфуций жинақтарын оқып, ұнатқан цитаталарын күнделігіне түртіп қояды. Еңбек демалысында «Манкент» шипажайында демалады. Майталман құрылысшы 13 жыл мұғалім болып жұмыс істегенде психологияны жетік меңгеріп шығады. Қайырымды жан қайырымдылық жасаумен айналысады. Жұмыс орнында тәртіп пен тиянақтылыққа көп көңіл бөледі.

Өз кәсібінің жілігін шағып, майын ішкен әріптесіміздің қолтаңбасы қалған «Мұнайшы» мәдениет сарайы, «Шерқала» қонақ үйі, «Өзенмұнайгаз» кеңсесі, ТТБ автостансысы, БЖБ кеңсесі, «Ақбөбек» лагері, «Кендірлі», «Медикер» ғимараттары ел игілігіне қызмет етуде.

Көп білетін, қолынан көп нәрсе келетін таптырмас маман, істейтін ісіне барлық күш-қайратын салатын Исахан Тобақабыловқа көп рахмет!

АРМАНЫ –

Бұрғылау жұмыстары басқармасына қарасты ӨКҚЦ-да такелажник болып жемісті еңбек етіп келе жатқан Асылбек Исмағамбетовтің әкесі Рахманберді Исмағамбетов ТТБ-да автобус жүргізушісі боп жарты ғасыр еңбек етіп, Өзен кен орны дамуына орасан зор үлес қосқан азамат. Бүгінде құрметті демалыста еткен қызметінің жемісін көріп жүр.

Кішкентай кезінде атақты боксшы Майк Тайсонға еліктеп, каратэ-домен 6 жасынан бастап айналыса бастады. Жалпы Асылбектің отбасы әуелден спортпен дос. Әкесі де, ағасы да былғары қолғаптың шаңын шығаруы Асылбектің де спортқа келуіне тікелей ықпалы болды. Мектеп қабырғасында жүріп жас бала көптеген спорттық жарыстарға қатысты. Өзінің табандылығының арқасында каратэ-додан Қазақстан чемпионатында жүлдегер атанып «Спорт шеберіне үміткер КМС» атағына ие болды. Бүгінде бапкерлікпен айналысып жүрген оның 150-ге жуық MMA аралас жекпе жек спортымен айналысатын шәкірттері бар, олардың ішінде 15-ке жуық шәкірті аралас жекпе жек спорт түрінен «Спорт шеберіне үміткер» атанды. Асылбек алдағы уақытта жастарға үлкен MMA аралас жекпе жек спорт мектебін ашу жоспарда бар екенін айтады.

– Адамда арман көп болады ғой. Менің арманым – шәкірттерім әлемдік аренада топ жарып, жеңіс тұғырына көтеріліп, қазақтың көк туын көкке желбіреп, адамды тебіrentетін қазақ елінің гимні ойнап жатса, керемет емес пе?! – дейді Асылбек Рахманбердіұлы.

Талабы таудай азаматқа дене шынықтыру мен спортты дамытуға қосқан үлесі үшін біршама марапат тапсырылды.

КӨК ТУДЫҢ ЖЕЛБІРЕГЕНІ!





ӘН ШЫРҚАҒЫМ КЕЛЕДІ

21 жастағы Самат Рахманбердиев ән айтуды жақсы көреді.

– Мен бірнеше жыл қатарынан Алматы, Астанада өткен ән байқауларына қатысып, жеңіс тұғырына көтеріліп, жүлдегер атанып жүрдім. Атап айтатын болсам Алматы қаласында өткен «Ақ көгершін», «Самға жұлдыз» байқауларынан 1-орын иеленіп, Қырғызстан астанасы Бішкекте өткен конкурста бас жүлдегер атандым. Сол кездегі әсерім мен қуанышымды сөзбен жеткізу мүмкін емес. Мені қаржылай қолдаған әкем, БЖБ жұмыскері Асылбек Исмағамбетовке көп рахмет. Мейіріміне бөлеп өсіріп, үнемі сенім білдіріп, мотивация беріп жүретін анам Сайраш Тарапиеваға да алғысым шексіз, – дейді әнші жігіт.

Адам тірлігінде әннің алатын орны ерекше. Ән шырқағанда, көңіл-күй көтеріледі. Адамға күш береді. Дарынды жасқа өнер саласында үлкен жетістікке жетіп, биікті бағындыра бер деген тілек айтамыз.



ЖҮРЕГІ ТАЗА, ҚОЛЫ ӨНЕРЛІ ЖАН



Ағы мен қарасы қатар жүретін өмір атты мектептің адамға берері де, үйретері де көп. Түрлі жағдаяттар мен тосын оқиғалардан сабақ ала отырып, адам баласы шыңдалып, түрлі машықты, әдет пен өнерді игереді.

Бүгінде Қоғамға қарасты №3 СКҚБ экскаватор машинисі болып қызмет жасайтын Жарылғасын Уәлиев есімді азамат сол өмір мектебінің үздік шәкірті, айналасына қандай пайдам, шарапатым тиеді деген оймен күн кешіп келе жатқан ізгі жанның бірі.

Түрікменстанның Ташауыз өңірінде 1961 жылы өмірге келіп, өсіп-өнген азамат 1984 жылы тағдырдың маңдайға жазуымен осы мекемеге қызметке орналасады. Мамандығы тракторшы. Жастайынан сурет салуға деген икемі жоғары болып, осы қабілетінің арқасында, жұмыстың ебін келтіретін, жеңілдететін түрлі құралдарды ойлап табуға деген ынтасы, бір сөзбен айтқанда өнертапқыштық қыры ашылады.

– Мен экскаватор машинисі, түсінікті тілмен айтсам заманауи жылдам қозғалатын экскаватор жүргізушісімін. Жүрген жерімде, қыдырып анда-мында шыққанда «мынау қалай жұмыс істеп тұр» деп барлық нәрсеге назар аударып қарайтын әдетім бар. Өз қызметіме ыңғайлап, ойда сұлбасын жасап, қағаз бетіне түсіре-

мін. Сосын әрбір детальға қолданыстан шыққан темірлерді жинаймын, жетпеген жерін сатып алып, токарь, дәнекерлеушілерге қажетті бөлікті жасатып алып, дайын болғанша тыным таппаймын, – дейді Жарылғасын аға.

Сол табандылығының нәтижесі болса керек, темірді түйген шебер біз барғанымызда көліктің серіппесін (рессор) ауыстыратын құрылғы жобасын жасап, өндіріске берген екен. Атаулы құрылғының тиімдігі сонда, ауыр келетін арнайы техниканың 3-4 адам қатар жүріп ауыстыратын серіппесін бір адам ғана қиналмай ауыстыра бермек. Бұл Жарылғасын Уәлиевтің жалғыз өнертабысы емес. Ол туралы басқарма басшысы Лескен Башығұлов:

– Жарылғасын Уәлиев ұзақ уақыттан бері қызмет жасап келе жатқан, аса тәжірибелі білікті маманның бірі. Ол қолына алған қарапайым шайбаның өзінен көпшілікке пайдасы тиетін, таң қала қарайтын дүние жасап шығаратын шебер. Өз ісіне адалдығы мен шынайы жанашырлығының арқасында нәтижелі еңбек көрсетіп келеді, – деді ағынан жарылып.

Басшының айтуынша, бір жылдан соң құрметті зейнетке шығатын ағамыз көпшілік секілді сол уақытыма аман жетсем болды деп қоймай, бар білгенін жастарға үйретіп, бөлісуді жөн көреді.



ӨНДІРІСТІҢ ӨЗ АДАМЫ

– Жалпы әр дүниені жасаудың өз жолы мен реті болады. Жұмысты оңтайландырып, жеңілдететін құралдар жасалса, онда адам еңбегі азайып, күш-қуатына үнем болады. Ол өз кезегінде басқа да қызметті атқаруға қабілетті болып тұрады, – деп топшылайды кейіпкеріміз. Осы мақсатта құралдардың жобасын ойластырып, жұмысты жеңілдету жолын іздеп келеді.

Әріптестері аға ойлап тапқан құрылғымен қатар, қолдан жасап шығарған домкраттың да тигізетін пайдасы көп екенін ризашылықпен жеткізді.

Алдағы уақытта маман дайындаған құралдарды патенттеп, өндірісте пайдалануға болатыны жайлы сәйкестік сертификатын алу жоспарда бар.

– Егер сол құжат берілсе, осыған дейін кемінде жарты күн алатын жөндеу жұмысына небары 1-2 сағат ғана жұмсар едік, – дейді әріптесі №4 автотізбек бастығы Еркін Берекетов.

«Әке көрген оқ жонар, шеше көрген тон пішер» деген халық мақалының хақтығы болса керек, бүгінде Жарылғасын ағаның ізін жалғаған ұлы Талғат та темір-

ден әр түрлі бұйымдар жасайтын шебер. Теңге ауылының мерейтойына арнап өз қолымен «Теңге ауылына 55 жыл» және бүркіттің бейнесін, қаладағы «Даңқ» аллеясына танктің архитектуралық кіші формасын жасап, сыйға тартқан. Бұл да әке ұлағатының шынайы көрінісі болса керек.

Ұзақ жылдан бері қызмет етіп келе жатқан Жарылғасын Уәлиевті әріптестері жақсы аға, білікті маман деп сыйлайды. Ол басқармадағы еңбек жағдайы мен қауіпсіз жұмысты ұйымдастыруға белсенді араласады.

Өзі су ішкен мекеменің дамуына, ұжымның еңбегі жануына шын тілектес, жүрегі таза, қолы өнерлі азаматтың қалауы орындалып, қолынан шыққан дүниелері көпті қуанта берсе екен деп тіледік.




“ӨЗЕНМҰНАЙГАЗ” АҚ БОЙЫНША 2023 ЖЫЛДЫҢ СӘУІР АЙЫНА КӨРСЕТКІШТЕРДІҢ ОРЫНДАЛЫСЫ





МҰНАЙ ӨНДІРУ:

ЖОСПАР 442 908
НАҚТЫ 405 253
АУЫТҚУ -37 655



ГАЗ КОНДЕНСАТЫН ӨНДІРУ:

ЖОСПАР 327
НАҚТЫ 339
АУЫТҚУ 12



МҰНАЙ ТАПСЫРУ:

ЖОСПАР 442 027
НАҚТЫ 405 755
АУЫТҚУ -36 272





ЗЕРТХАНАШЫ ГҮЛНАР

Гүлнар Сұлтанова 1962 жылы Атырау облысындағы Сағыз поселкісінде өмірге келеді. Мектепті 1980 жылы бітіріп, осы жылы Өзен кен орнына келіп, 1 қыркүйектен бастап Мұнай дайындау және өндіріске қызмет көрсету басқармасы орталық зертханасының мұнай құрамындағы суды талдау қызметіне 3 дәрежелі зерттеуші болып орналасады. Уақытты уысына ұстап тұрар кім бар дейсің?! Бүгінде 5-дәрежелі зертханашы Гүлнардың мұнай саласында жемісті еңбек етіп жүргеніне 43 жыл болыпты. Жұмыста жүріп Гүлнар 1984-87 жылдары Жаңаөзен мұнай техникумын бітіріп алады.

– Бойда жастық шақ жалыны бар кезде қоғамдық жұмысқа белсенді араластым. Бұрынғы бастығым Сәлима Ағысқызы мен тәлімгерім Айсәуле Аманқожақызына алғысым шексіз. Осы кісілер салған сара жолды жалғастырып, ел игілігі үшін еңбек етіп келемін. Жылдар өте өзіміз де тәлімгерлік тұғырына көтеріліп, шәкірттерге істің қыр-сырын үйретіп, жұмыс талап еттік. Еңбегім еленіп, 1984-1985 жылдары қалалық депутат болып, қаладағы әлеуметтік мәселелердің оң шешімін табуына бір кісідей ат салыстым. Халықпен жұмыс істеудің қаншалықты ауыр ері жауапты қызмет екеніне, әлеуметтік инфраструктураны дамытпайынша, халықтың тұрмыстық жағдайына көмектеспейінше, өндірістің қалыпты дамымайтынына көзім жетті. Әріптестерім қай бір жылы «Өзенмұнайгаздың» есебінен Анталияға тегін жолдама ұсынып, шетелде демалып қайттым. Түркияда барлық инфрақұрылым іске қосылған. Қызмет көрсету сапасы жоғары. Келушілерге қолайлы жағдай жасалған. Адам жанына қажеттінің бәрі бар. Сені ескі танысындай қарсы алады. Ұнады. Керемет екен. Марапат



жетеді. Биыл 8 наурызға орай қала әкімі қабылдады. Алғыс хат алдық. Концерт тамашаладық. Ресторанда біздің құрметімізге жайылған мерекелік дастархан қонағы болдық. «Көңіл көңілден су ішеді» демекші, қала басшысының елеп-ескергеніне мәз болып қалдық, – дейді Гүлнар Сағидоллақызы.

Аяулы жан 1991 жылы мұнайшы отбасына келін болып түседі. Отағасы Қосдәулет Айтниязов еңбек жолын №1 МГӨБ-те қарапайым оператор боп бастап, өзінің еңбекқорлығының арқасында цех бастығы дәрежесіне дейін көтеріледі. Өзен кен орны өркендеуіне қомақты үлес қосып, елмен бірге тер төккен әзіз азамат, сыйлы әке, майталман мұнайшы мұнай саласында 39 жыл еселі еңбек етіп, енді бала қызығын көрем деген кезеңде қайтыс болады.

«Тас түскен жеріне ауыр» демекші, ерінен айырылып, қанаты қайырылып қалған Гүлнар өмір сынағына төтеп берді. Бүгінде келін алып, қыз ұзатып, Алла берген немере-жиендерін қызықтап отырған бақытты әже. Балалары әр салада жемісті еңбек етіп, ел көркеюіне сүбелі үлес қосып келеді. Мәселен Аяулымы «КезБИ» жауапкершілігі шектеулі серіктестігінде реттеуші, Асылбегі жер бөлімінде, Райымбегі автоматика бағытында, Жібегі «Мұнайшы» мәдениет сарайында хореограф болып өз нәпақасын тауып жүр.

Бос уақытында тоқыма тоқып, ас пісіргенді жақсы көретін мұнайшы ханым Тамара Асардың әндерін сүйіп тыңдайды. Саналы ғұмырын ел гүлденуіне арнаған асыл жанға көп рахмет. Алдан тек ғана жарқын күндер мен жақсы жылдар күтсін деген тілегіміз бар.





“ӨЗЕНМҰНАЙГАЗ” АҚ ҚАРАСТЫ ӨНДІРІСТІК-ҚҰРЫЛЫМДЫҚ БАСҚАРМА БАСШЫЛАРЫ



Жеңісбек СҮЛЕЙМЕНОВ
№1 МГӨБ директоры



Мереке ҚҰЛБЕКОВ
№2 МГӨБ директоры



Мақсат ТОҚБАНОВ
№3 МГӨБ директоры



Ержан БЕКЖАНОВ
№4 МГӨБ директоры



Сәкен АЛШЫНБАЕВ
МДжӨҚКБ директоры



Ықылас МЕНДІБАЙ
БЖБ директоры




Қуандық ЕДІЛОВ
ӨЭМБ директоры



Нұрбек СОЮНОВ
МӨҚЖТЖБ директоры



Бисенбай ҚАРЖАУБАЕВ
№1 СҚКБ директоры



Наурыз РАХМЕТОВ
№2 СҚКБ директоры



Лескен БАШЫҒҰЛОВ
№3 СҚКБ директоры



Жәнібек ӘЗБЕРГЕНОВ
№5 СҚКБ директоры



Қанат БАЗЫЛОВ
ТТБ директоры



Марат САДЫҚОВ
АжТБ директоры



Бақытбек МЕРГЕНБАЕВ
ХжЭБ директоры



Мәмбет БИГЕЛДИЕВ
МӨҚЖТЖБ директоры



Мұрат АҚЫН
КОО басшысы



САЛАУАТТЫ ӨМІР САЛТЫН ҰСТАНЫП ЖҮРГЕН МҰНАЙШЫ

Төрехан Тұрғанбаев көршілес Түрікменстан елінде Ташауыз қаласында 1961 жылдың 15 ақпанда қарапайым көп балалы отбасыда дүние есігін ашады.

Мектептен кейін әскер қатарына шақырылып, Ресейдің Калуга қаласында болады. 1981 жылы Жаңаөзен қаласына көшіп келіп, ӨТҚЖЖБ жұмысқа орналасады. Шебер Рахмет Әлібаев қанатының астына алып, ісінің мән-жайын түсіндіріп бағды. Зайыбы, балаларының анасы Раушан Дәрібаева да осы басқармада жемісті еңбек етіп, бүгінде бейнетінің зейнетін жеп отырған бақытты жан. Балаларынан өрбіген немерелерін қызықтап, бақыт шуағына шомылып жүрген жайы бар.

Кейіпкеріміз жер үйде тұратындықтан бақша егеді. Ұсынақты да еңбекқор жанның төккен тері босқа кетпей алма, алмұрт, жүзім, өріктері көздің жауын алып, көп өнім береді.

– Мен бос уақытымда теледидардан айтыс тамашалаймын. Адам жасы ұлғайған сайын жақындарының қадірін біле түседі екен. «Өзенмұнайгаз» жұмыс істейтінімді мақтан тұтып, жұмыс орнымды бағалаймын. 250 адамнан тұратын шағын басқарма болғанымен ӨТҚЖЖБ еңбек ұжымы өте тату. Жаңа техника көптеп келіп жатыр. Соның арқасында жұмысымыз анағұрлым жеңілдеді. Жиі-жиі «Кендірлі», «Жаңақорған» шипажайына барып, денсаулығымды нығайтып қайтамын. Асхана асы ұнайды. Дәмі тіл үйіретін тағам әзірлеп беретін аспаздарға мың алғыс! – дейді Төрехан Базарбайұлы.

Серпін беріп, көңіл-күй көтеретін басқарма мерекелеріне белсенді ат салысатын ол жонынан таспа тілсе, қыңқ етпейтін батырлық пен қайсарлық талап ететін арқан тартуға қатысып, салауатты өмір салтын ұстанады.



МАМАНДЫҒЫМДЫ МАҚТАН ЕТЕМІН



№1 Скважиналарға қызмет көрсету басқармасында электрик болып жұмыс істейтін Исабек Төлегенов 1960 жылы 25 шілдеде Түрікменстанның Балқан облысында дүниеге келді. 1967-1977 жылдары Жаңаөзендегі Төлесін Әлиев атындағы №1 мектебін бітіріп шығып, 1977-1979 жылдары № 5 АТП мекемесіне электрик мамандығы бойынша жұмысқа орналасады. Жалындап жүрген жас жігіт 1979-1981 жылдары Отан алдындағы екі жылдық әскери борышын өтеп келіп, 1992 жылға №5 АТП-да өнімді еңбек етеді.

Бос уақытында Таңатар Досымжановтың әндерін сүйіп тыңдайтын Исабек бүгінде Алла берген балаларынан немере, жиен сүйіп, бәйбішесімен тату-тәтті ғұмыр кешіп жатқан жайы бар.

– Халық бойына құт боп дарыған мұнай саласында жұмыс істейтінімді мақтан етемін. Адам үшін істеп жүрген жұмысын жақсы көру маңызды. Электрик – адам өміріне қауіп төндіретін күрделі де қызықты кәсіп. Компания дамуы үшін әр маманның қабілеті, білімі, білігі, адалдығы маңызды. Қасымда ел мен жер үшін риясыз еңбек етіп жүрген азаматтар жеткілікті, – дейді аға мұнайшы.





МҰНАЙШЫНЫҢ ЧЕМПИОН БАЛАЛАРЫ



ЕРКІНБЕК БАЙТӨРЕЕВ

2000 жылдың 8 қазанында дүние есігін ашқан Еркінбек Байтөреев бүгінде Ақтау қаласындағы Есенов атындағы университеттің 4-курсында оқиды. 13 жыл бойы тұрақты түрде каратэ-домен айналысып жүрген Еркінбек Азия, әлем чемпионаттары мен халықаралық турнирлерге қатысып, жеңіс тұғырына көтеріліп, жүлдегер атанып жүр.

Спортшы жігіт 2017 жылы Испанияда өткен әлем чемпионатында 1-орын, 2019 жылы Чилиде өткен әлем чемпионатында 3-орынға ие болды. Болашақта олимпиада чемпионы болуды армандап жүрген талабы таудай Еркінбектің әкесі Ораз Ыбыраев Мұнай дайындау және өндіріске қызмет көрсету басқармасында, анасы Жанар Сисенбаева №3 МГӨБ-те абыройлы еңбек етіп, ел ырысын еселеп жүрген абзал жандар.

Дүбірлі додада топ жарып, биіктен көрініп жүрген талантты спортшы өзінің жаттықтырушылары Лаура Айтжанова, Мирас Шамов, Азамат Құбашовтарға көп алғыс айтады.



НҰРДӘУЛЕТ ҚҰТТЫБАЙ

12 жасар Нұрдәулет Құттыбай қаладағы №7 жалпы білім беретін мектептің 7 «а» сыныбында оқиды. 1-сыныптан бастап каратэ-домен достаса бастаған ол түрлі қалалық, облыстық, республикалық, халықаралық жарыстарға қатысып, 34 рет жүлдегер атанды.

Спортпен бірге сабақты жақсы оқитын зерек бала математика, физика, дене шынықтыру пәндерін жақсы көреді. Өскенде сәулетші болуды армандап жүрген Нұрдәулет Жаңаөзен қаласының архитектурасын өзгертіп, әлемдегі әсем қаланың біріне айналдырғысы келеді.

Спортшының әкесі Қазыбек Қалиев Бұрғылау жұмыстары басқармасында, шешесі Гүлайым Қайыпова №7 мектепте мұғалім боп еңбек етіп, ел экономикасы дамуына қомақты үлес қосып жүрген білікті мамандар.

**ӘЛТАЙЫР ЖАЛҒАСБАЕВ**

15 жастағы Әлтайыр Жалғасбаев қаладағы Қашаған Күржіманұлы атындағы № 8 орта мектептің 10 «ә» сыныбында оқиды.

Каратэ-до спортымен 5 жыл бойы айналысып жүрген Әлтайыр қазақ тілі пәнін ұнатады. 2022 жылы Қазақстан Чемпионатының чемпионы атанып, Қазақстан құрама командасы мүшелігіне өтті. Спорт шеберіне үміткер. Каратэ додан халықаралық және ҚР жарыстар жүлдегері. Әлем чемпионаты мен Азия чемпионатына қатысушы.

Әлтайырды білікті бапкерлер Лаура Айтжанова, Мирас Шамов, Азамат Құбашовтар жаттықтырып, кіл мықты бақ сынайтын бәйгеге қосып жүр.

Болашағынан үлкен үміт күттіріп жүрген жас спортшының әкесі Әлібек Жалғасбаев «Өзенэнергиямұнай» басқармасында электрик болып ерен еңбек етіп, Өзен кен орны дамуына сүбелі үлес қосып келеді. Шешесі Үзілхан Мәзенова үйде жаңа Қазақстан құрылысшыларын тәрбиелеумен айналысып жатыр.

**ДІНАСЫЛ РАДЖАН**

Есболдың ұлы 12 жасар Дінасыл №9 орта мектебінің 6 «д» сыныбында оқиды. 4 жылдан бері каратэ-домен табанды түрде айналысып жүрген спортшы бала Қазақстан чемпионатына қатысып, жүлделі 2-орынды қанжығалады.

Спортпен бірге сабақты қатар алып жүрген тәртіпті бала жаратылыстану, қазақ тілі, тарих пәндерін жақсы көреді. Әкесі Есбол Дербісов Бұрғылау жұмыстары басқармасында бұрғышы көмекшісі болып, өнімді еңбек етіп келеді. Ел игілігі үшін тер төгіп жүрген мұнайшы жетістікке жетіп жүрген спортшы баласымен мақтанады.



АЛДИЯР МӘДЕНИЕТОВ

13 жасар Алдияр Мәдениетов қаланың Төлесін Әлиев атындағы №1 мектебінің 8 «а» сыныбында оқиды. Каратэ-домен 8 жыл қатарынан айналысып жүрген жас спортшы қазақ тілі пәнін жақсы көреді.

2022 жылы Қазақстан Чемпионатына қатысып, чемпион атағын жеңіп алды. Спорт шеберіне үміткер. Каратэден халықаралық және ҚР жарыстарының жүлдегері. Аталмыш спорт түрімен үздіксіз жаттығып жүрген жас ұлан алдағы уақытта әлем чемпионы болып, әке-шешесі мен бапкерлерін қуантуды армандайды.

Алдиярдың әкесі Сағындық Қалидуллин Мұнай өнеркәсібі құралдарын және телекоммуникацияларды жөндеу басқармасында, ал шешесі Шолпан Өткілбаева «Стоматология» ЖШС-інде медбике болып еңбек етіп, ел дамуына айтарлықтай үлес қосып келеді.




БӘРІНЕ ҮЛГЕРЕТІН ЖҰМАЗИЯ ХАНЫМ

Кейіпкеріміз Жұмазия Жариева №3 Мұнай газ басқармасында анау-мынау емес 39 жылдан бері табан аудармастан жемісті еңбек етіп келеді.

Жұмазия Атырау облысына қарасты Боранқұл ауылында интеллигенция отбасында дүниеге келді. Әкесі мұғалім, шешесі дәрігер болып жұмыс істеп, ел экономикасының дамуына орасан үлес қосты. Көп балалы отбасының кенжесі болып тайраңдап өскен ерке қыз мектеп бітірген соң, Атырау қаласындағы мұнай колледжін бітіреді.

– Отбасымда, тумаластарымның арасында мүлдем мұнайшы болмаса да, неге екенін білмеймін мен осы саланы таңда-



дым. Оған еш өкінген емеспін. 1984 жылы Өзенге Атыраудан жолдамамен келдім. Бастапқыда №3 МГӨБ-ке қарасты №3, 69 топтық қондырғыларда оператор болып жүрдім. Еңбекқорлығыммен көзге түсіп, кеңсеге келдім. Геолог, табель толтырушы, кейінірек үйлестіруші болдым. Қызметім өзіме ұнайды. Ұжымдағы адамдарға әбден бауыр басып кеттім. Уақыт шіркін, бір орында тұрмайды екен. Ту зытымда жатқандай көрінген 60 деген жасқа да толдым. Құрметті демалысқа шығатын уақытым да таяу қалды. Басшылыққа, әріптестеріме ризамын. Алғыс білдіремін, – дейді Жұмазия Адайбайқызы.

Отағасы Болат Өгізбаев «ҚазГӨЗ» ЖШС elektrik болып, төп-тәуір жұмыс істеп келеді. Үлкен баласы Арқар да №3 МГӨБ-те Скважиналарды жерасты жөндеу бригадасы шебері боп көп-көрім қыз-



МАМАНДЫҒЫМ МАҚТАНЫШЫМ

мет етіп, ұжым құрметіне ие болып жүр. Өзге балалары Азамат пен Нұрбек те еңбек етіп, ел ырысын еселеп жүрген жайы бар. Жұмазия Роза Рымбаеваның әндерін тыңдап, «Қыз Жібек» фильмін сүйсініп тамашалайды. Еті тірі жан жұмысты да, отбасыны да қатар алып келеді. Қазақтың ұлттық тағамы асылған етті жақсы көреді. 2000 жылы дәм тартып, тақтайдай тегіс жолдары мен күтім жасалған бақтары бар Германияда болып, бұ дүние үшін еңбек етпеген ұлт кедейленіп, ғылым-білімінің, тұрмыстың қай жағынан болса да артта қалып, мешеуленетінін түсініп қайтады.

Қолы қалт еткенде фитнеске барып, немерелер тәрбиесімен айналысатын майталман мұнайшы адам бойындағы адамгершілік пен мейірімді құрмет тұтады. Алладан ел мен отбасы бақытын тілеп отырған жақсы жанның шаңырағына ырыс, құт-береке, аман-саулық, сәт тілейміз.



Жамал

мұнайшы шығармашылығы
Бибігүл БӨБЕКБАЙ

Таңертең ерте тұрған Жамал ұйқысын ашы кофемен сергітіп, асүйде күйбеңдеп жүрді де қойды. Отағасы 65 жасқа толып, соның құрметіне дастархан жайып, кешке жақын-жуықты шақырмақшы болып жатқан түрі. Келін ұйқыдан тұра қойған жоқ. Кішкентайдың тісі жарып, қызуы көтеріліп, мазасызданып, түнімен жылап шықты.

Бұйырса ержетіп тұрған екінші баласына келін алуға қамданып жатыр. Өткенде құда түсіп қайтты. Болашақ келіні қар астынан шыққан бәйшешектей нәзік қыз екен. Бірден ұнады. Үлкен келіні де шүкір жаман бала емес. Аталап, енелеп құрақ ұшып тұрады.

Қасында аяққа оратылып жүрген үлкен қызының 3 жасар сүйкімді баласы «Мысық неге пырылдайды? Ит неге үреді?» деп, басын шыр айналдырды.

Көмектесуге келген кіші қызының аузына тыным жоқ. Бірді айтып бірге кетеді. Күйеуіне көңілі толмайды. Ақшаның жетпей жатқанын айтады. Үлкен қызы Дариғадай емес Сағирасы сәл затқа күйіп-пісіп жатады. Қос-қостан киім алады да елге алақан жайып жүреді. Бірде қарыз сұрап келген қызына жұқалап ескерту жасап еді. Қызы «қарыз бермейтін болсаң бермейтініңді айт, енді тойға да, қойға да екі көйлек, бір жемпір киіп жүре бермейтін шығармын» деп шарт кетті.

Жалғанды жалпағынан басып жүрген нағашысын, бұның жан дегенде жалғыз ағасын да жақтырмай жүр.

– Соны қонаққа шақырмашы пажалыста. Қымбат көлігін, екі этаж үйін айтып, жыртылғанша мақтанады. Одан қала берді 50 елде болдым, 70 елде болдым деп адамның нервысына тиеді. Қасында отырып, қызғаныштан жарылып кете жаздайсың, ішкенді ірің, жегенді желім етеді. Тамақ батпай, адамды кішігірім депреснякқа түсіреді, – деді тыжырынып. Жамал үндемей құтылды.

Соңғы кезде күнделікті күйбең тіршіліктен кәдімгідей шаршап қалатын болып жүр. Кішкентайларымен екіетек болып жүретін келініне жаны ашып, көмектесемін деп жүріп, діңкесі құриды. «Бір бала бір кемпірді өлтіріптіні» айтқан қазақтың даналығына еріксіз сүйсінеді.

Жарты ғасыр бірге тұрып жатқан отағасы осы жыл ішінде қол жұмсамақ түгілі, түртіп көрмеді. Тілсіз ұғысып, тату-тәтті тұрды. Ұл өсірді, қыз өсірді. Екеуі де мұнай саласында жұмыс істеп, балаларды оқытты. Тәттіні жегізіп, жақсыны кигізді.

Жамал балалар өскен кезде өзі ұнататын сурет салу үйірмесіне қатысып, спортпен айналысты. Суретші жігіт бұл салған картиналарға ұзақ үңіліп тұрып «бұлт негізінен көңілсіздік белгісі, көп қолданбағаныңыз жөн», – деп ескерту



жасады.

Түрлі байқаудан орын алып жүрген оның «сіз бояуларды үйлестіре аласыз, кейбір суреттеріңізде кәдімгідей мағына бар» деген мақтау сөзіне мәз болып, әр тамшы бояудан рақат алып жүрді. Ал күйеуі жолдастарымен стадионға барып, футбол көріп, жанкүйер болып, айғайлап қайтқанды ұнатады.

Бүгінде Жамал бастауыш сыныпта оқитын Әмина атты немересімен ютубтан жапондарша қағаз тырна жасауды үйреніп жүр. Жеміс-жидек турап тұрған жиен қыздар жырқ-жырқ күліп, бір жырғап қалды.

Сағира айналып келіп жұмыссыз байын сөз етті. Қырсық қыз өзін «Құсалықпен өтті ғой, Махамбеттің көп күні», – деп кекетіп қояды.

– Байым мойынға жүк болып, иықты жаншып, құр тұрып-ап адамның күллі қуатын сорып алады. Қонаққа барғанда тірлікке жоқ ебедейсіз жанның кемеліне келген салиқалы адам образына кіріп отырғанына қарап отырып, адамның күлкісі келеді. Нан табу үшін жанталасып жүрген ата-енеме жаным ашиды. Енем құдайдың құтты күні базарда кепкен балық сатып тұрады. Жұмыс істемесең жан бағу қиындайтынын, әркімнің өз жұмысы бар екенін түсінбейтін байымның басы орнында ма деп күдіктенемін. Отбасы

өміріне үмітсіздікпен қарайтын кісімен өмір сүрудің қандай қиын екенін ешкім түсінгісі келмейді, – деді қызы мұңайып.

Жамал тілін жұтып қойғандай тырс етіп үндемеді. Көңілсіз әңгімеден көңілі қоңылтақсыды.

Асүйдің терезесін ашып, екінші қабаттан сыртқа көз тастады. Әппақ, бойлы, сойлы реңді қыз қанды қыздыратын Латын Америкасы әуендері шығып тұрған кафеге бет түзеді. Тентек бала қасындағыларға тілін шығарып, ортан терегін көрсетіп жатты. Орындықта тізілген жасөспірімдер қалта телефонынан құтыла алмай азап шегіп отыр. Желімдеп қойғандай, сағаттап отыруға бейіл. Обалдағы-ай...

– Жамбасы тесілгенше жататын еркек құрметке лайық емес! – деген қызының сөзі құлағына жетті. Етегінен ұстап, жетегіне ерген байының үмітін ақтамағаны өкінішті-ақ.

«Сырлы аяқтың сыры кетсе де, сыны кетпейді» дегендей 60-тан асса да, өңін бере қоймаған Жамалдың есіне сүйген жарының алғаш кездесуге шақырған күні «сіздің әлеміңіз туралы бәрін білгім келеді» деп үздіге қарағаны есіне түсіп, еріксіз жымыды.

Қазаннан шығып жатқан сүр еттің иісі танауды қытықтап, төбетті аша түсті.



КИНО АДАМДЫ ӨЗГЕРТЕДІ

«Доктор Ча»

Оңтүстік корейя түсірген «Доктор Ча» сериалын көруге кеңес береміз. Басты кейіпкердің қытымыр енесі бар. Сенімсіз байы бар. Ымыраға келмейтін ұлы мен қызы бар. Өмірі тұнып тұрған стресс.

Отбасының жүгін артып алып, жанталасып жүрген дәрігер Чаның бауырынан ісік табылады. Жақындарынан қолдау таппай жүнжіп кеткен келіншекке жаның ашиды.

Кино кейіпкерінің тағдырына ұқсас жандар қазақ қоғамында да жетіп артылады. Картина көрерменге кез келген адам өзін құрметтеуі тиіс деген ой тастайды.

Парасатты келіншек ғашық болған өзінен он жас кіші хирургтен бас тартады. Қазақта «Тең теңімен, тезек қабымен» деген жақсы сөз бар. Ерлі-зайыптылар бір шаңырақ астында тату-тәтті тұру үшін деңгей, жағдай, көзқарас бәрі қарайлас болуы шарт. Бәрінен шаршаған Ча тыныш өмір сүргісі келеді...

Тоғетері, демалыс күндері фильмді көріңіз. Қызық кино. Өкінбейсіз.





КІТАП АДАМДЫ ӨЗГЕРТЕДІ

Ағылшын жазушысы Руал Даһлдың әлем балалар әдебиеті ортасында шоқтығы биік «Чарли және шоколад фабрикасы» шығармасын оқуға кеңес береміз.

Кітап кейіпкері Чарлидің үйінің жанында үлкен шоколад фабрикасы бар. Мектепке барар жолда бала жүрісін баяулатып, ауаны құшырлана жұтады. Әйтсе де Чарли үшін шоколадтың ауылы тым алыс, дүкеннің терезесінен текше-текше жиналған шоколадты көргенде сілекейі шұбырып кетеді.

Ертегі алты ересек, бір ұлдан тұратын сіңірі шыққан кедей отбасы өмірі жайлы.

Чарлидің тоқсаннан асқан аталары мен әжелері төсектен тұруға құдіреті жетпей кептіріліген өріктей мыжырайып жатқаны жатқан. Жұмыс істейтін жалғыз адам мистер Бакет. Оның жалақысы тоя тамақ ішуге де жетпейді.

Чарли осылардың жалғызы, жарық сәулесі. Ақылды, артық-ауыс қылығы жоқ бала қолындағысын өзгелермен бөліскісі келіп тұратын мейірімді болып өсіп келеді.

Оның арманы тойып шоколад жеу...

Хикаяның үлкендерге де, балаларға да ұнайтыны сөзсіз. Оқыңыз, өкінбейсіз!

РУАЛ ДАҢЛ ЧАРЛИ ЖӘНЕ ШОКОЛАД ФАБРИКАСЬ

Суретін салған
Күентин Блэйк



2022 жылдың желтоқсанында Еңбекті қорғау және өнеркәсіптік қауіпсіздік департаменті мамандары сан түрлі сынамадан өткізіліп, лайық деп танылған киім үлгісін таныстырған болатын.

– 2023 жылдан бастап жұмысшыларға жаңа үлгідегі киім үлестіріліп жатыр. Жұмыс формасының түсін ауыстыру туралы ұсынысты мұнайшылар бірнеше жылдан бері айтып келеді. Осыған байланысты департамент мамандары еліміздің түпкір-түпкірінен алуан түрлі жұмыс киімі үлгілерін алдыртып, түрлі сынамадан өткізіп көрді. Нәтижесінде арамид матаның номакс түріне тоқталдық, - деді бас директордың еңбекті қорғау, өнеркәсіптік қауіпсіздік және қоршаған ортаны қорғау жөніндегі орынбасары Өсербай Тұрсабеков.

Аталған материал түрі – шамалыға өртенбейтін, ауа өткізу көрсеткіші 63% құрайтын мата. Бұрынғымен салыстырғанда матаның ауа өткізу пайызы жоғары, жұқа әрі жеңіл, сәйкесінше бағасы да – қымбаттау. Жұмысшылар тарапынан осыған дейін қолданылып келген қызыл түске байланысты біраз шағым түскен еді. Мұнайшылар жаздыгүні күн тартпайтын, ақшыл түске ауыстыруды өтінген. Осыған сәйкес жиналыста жаңа киім үлгісінің түсі, дизайны мен материалы келісілді.

Берілетін жұмыс формасына арнайы код бекітіліп, сол бойынша әр мұнайшыға киімге қатысты SMS-хабарламалар келіп тұрады. Жаңа киімді алу мерзімі де осы жүйе арқылы хабарланатын болады.





ҚҰТТЫҚТАУ



Ардақты әріптестер!

Мерейлі жасыңыз құтты болсын дей отырып, деніңізге саулық, отбасыңызға аман-дық, ел игілігі үшін атқарып жүрген қызметіңізге табыс, өміріңізге береке тілейміз.

Әрқайсыңыз ерен еңбек ете жүріп, Өзен кен орны дамуына өлшеулі үлес қосып келесіз. Басшылық әрбіріңізді мұнай саласының майталман маманы ретінде өте жоғары бағалайды. Кәсібіңіздің жілігін шағып, майын ішіп, сол саланың шыңына шығып отырған тәжірибелі де білікті кез келгеніңізбен біз мақтанамыз. Үлгі-өнеге тұтамыз.

Арайлап атқан әрбір таң шаңыраққа құт пен береке әкелсін. Тойыңа жұрт жиылсын, Көңілге нұр құйылсын, Дәл осындай мерей жас, Біздерге де бұйырсын, – демекші тойыңыз тойға ұласып, 100 деген әдемі жасқа жетіңіз, қадірлі әріптестер!

Құрметпен, «Өзенмұнайгаз» АҚ еңбек ұжымы



ҚҰРМЕТТІ АРДАГЕРЛЕР!

Туған күн мерекесі құтты болсын. Құдай бақ берген мекенде ерен еңбек етіп, Өзен кен орны дамуына өлшеусіз үлес қосқан Сіздерге алғысымыз шексіз.

Ел игілігі үшін тынбастан еңбек етіп, өндірістің қиындыққа толы құбылыстарын бастан өткеріп, бейнетін арқалап, зейнетіне бөлену – кез келген адамның қолына түсе бермейтін бақыт.

Сіздердің адам қызығарлықтай мазмұнды өндірістік өміріңіз бізге үлгі-өнеге.

Қоғамның, ел мен жердің, отбасының алдындағы парызы мен қарызын азаматтықпен атқарып, Отанға адал қызмет етудің жарқын үлгісін көрсеткен Сіздерге мың алғыс.

Адам үшін ең қымбат нәрсе – оның өмірі мен денсаулығы. Аман жүріңіздер. Деніңізге саулық, отбасыңызға амандық, мәнді де сәнді, ұзақ ғұмыр тілейміз.

Калима Айдарова
Джанбирбай Джалгасов
Ирмек Исмагулова
Малик Кулмурзин
Мәмметберды Байбозов
Самат Курманбаев
Танатар Избасаров
Ахилес Смайлова
Сабирбай Албетов
Гульжан Омарова
Курбантурды Нуранов
Савтай Измаганбетов
Бугарбай Бекимбетов

Балиба Кузембаева
Кыдыргалы Кутубаев
Жексембай Хаметов
Аймурат Хасанов
Балкаш Бюрекбаева
Абжет Каржаубаев
Роза Байжанова
Сулеймен Дашымов
Шолпан Демеуова
Жолдыбай Еркимбаев
Нурлан Бекжанов
Бітімқұл Тұрсабек
Халджан Мананова



Ремонт

since 1964
OMG
team